

# **Contract da reuniun denter las pleivs da Cumbel/Peiden, Lumbrein, Suraua e Vrin**

## **Determinaziuns generalas**

### **Art. 1 Reuniun**

Las pleivs da Cumbel/Peiden, Lumbrein, Suraua e Vrin s`uneschan cun igl 1. da schaner 2018 el senn digl art. 87 dalla lescha da vischnauncas dil cantun Grischun applicada analogamein.

### **Art. 2 Num e territori**

La pleiv reunida porta il num « Pleiv catolica-romana da Lumnezia » e secumpona dallas quater pleivs anteriuras da Cumbel/Peiden, Lumbrein, Suraua e Vrin cun lur uclauns sin territori dalla vischnaunca Lumnezia.

### **Art. 3 Entrada en vigur**

Cun resalva dall`approbaziun dalla constituziun entras la cumissiun administrativa dalla Baseligia cantunala dil cantun Grischun succeda la reuniun sin igl 1. da schaner 2018.

## **Effects giuridics dalla reuniun**

### **Art. 4 Successiun universal**

La pleiv nova surpren ils dretgs e tuttas obligaziuns giuridicas dallas pleivs anteriuras.

Ella surpren tuttas activas e passivas, l`entira facultad, tuts dretgs e pensums sco era tuttas obligaziuns e pretensiuns dallas pleivs anteriuras.

Naven digl 1. da schaner 2018 vegn menau in niev quen per la Pleiv catolica-romana da Lumnezia. En quel vegnan las facultads dallas pleivs anteriuras reunidas.

### **Art. 5 Dissoluziun da collaboraziuns**

Eventualas collaboraziuns denter las pleivs anteriuras vegnan dissolvidas cun ils 31 da december 2017.

### **Art. 6 Suprastonza da pleiv**

La suprastonza dalla pleiv secumpona da 6 commembers (il president, il vicepresidente/actuar, dus geraus, in cau da finanzas ed il plevon (en ex officio) ). Las pleivs anteriuras han il dretg d`esser representadas ella suprastonza dalla pleiv nova cun silmeins in representant.

Quella regulaziun duei valer schi ditg sco igl ei pusseivel da tscharner mintgamai in representant ord la pleiv anteriura.

### **Art. 7 Sedia**

La sedia dalla pleiv ei mintgamai il liug da domicil dil president.

### **Art. 8 Fundaziuns ecclesiasticas**

Las fundaziuns ecclesiasticas cun lur facultad restan vinavon autonomas e vegnan administradas naven dalla vigur dalla pleiv nova tenor vegl dretg ed izonza, sebasond sin art 59 al. 1 dil Cudisch civil Svizer.

#### **Art. 9 Affittaziun da terren**

Da principi valan per tut ils purs e cultivaders da beins dallas pleivs anteriuras e dallas fundaziuns ecclesiasticas ils medems dretgs enteifer la pleiv nova. Igl emprem dretg sin ina affittaziun dil fons pervenda han ils purs che habiteschan el vischinadi nua ch'il fons dalla pervenda sesanfla. Per l'affittaziun futura dil schischom vegn relaschau ulteriuramein in reglament corrispudent . Schiditg che quei reglament ei buc en vigur, van ils tuts contracts existents vinavon tenor termin.

### **Procedura**

#### **Art. 10 Decisiun enteifer las pleivs**

L'approbaziun dil present contract da reuniun succeda il medem mument a caschun dallas radunonzas da pleiv da Cumbel/Peiden, Lumbrein, Suraua e Vrin

La reuniun va en vigur mo sche tuttas pleivs approbeschan il contract da reuniun senza midadas.

### **Reglamentaziuns transitorias**

#### **Art. 11 Suprastonza transitoria**

Ils presidents dallas anteriuras pleivs sco era mintgamai in consuprastont fuorman ina suprastonza transitoria per las lavurs preparatoricas en connex cun la reuniun e per l'execuziun da tala. Ella resta en uffeci entochen ils 31 da december 2017 e seconstituescha sesezza.

#### **Art. 12 Radunonza constitutiva**

Vegn la reuniun decidida, cloma la suprastonza transitoria a dretg temps alla radunonza constitutiva dalla pleiv nova e suttametta a tala ils suandonts puncts per approvaziun :

- consitituziun dalla pleiv
- lescha da taglia
- reglament da salarisaziun
- elecziun dalla suprastonza
- elecziun dalla cumissiun da quen e gestiun
- fixar il pei da taglia
- outras tractandas necessarias

#### **Art. 13 Radunonza da pleiv 2018**

Aschi baul sco pusseivel egl onn 2018 cloma la nova suprastonza a l'emprema radunonza dalla « Pleiv catolica-romana da Lumnezia » cun las suandontas tractandas :

- protocol dalla radunonza constitutiva
- approvaziun dil quens annuals 2017 dallas pleivs anteriuras, revedi entras las cumissiuns da quen e gestiun da talas
- approvaziun dil protocols dallas pleivs anteriuras
- preventiv 2018
- outras tractandas necessarias

**Art. 14 Dretg applicau**


Duess buca tut la legislaziun dallas anteriuras pleivs esser unificada e remplazzada entras la legislaziun dalla pleiv nova entochen l'entrada en vigur dalla reuniun, applichescha la suprastonza transitoriamein la legislaziun dallas pleivs anteriuras mintgamai sin lur intschess.

**Art. 15 Obligaziun da fideivladad**

Entochen che la reuniun ei buca en vigur astgan las pleivs existentas surrender, respectiv concluder neginas expensas novas ch`ein el mument dall'approbaziun dil contract da reuniun buca enconuschentas e ch`ein buca urgentas.

Approbaus dallas radunonzas da pleiv digl 1. da settember 2017


Pleiv da Cumbel/Peiden :

  
President




  
Actuara


Pleiv da Lumbrein :

  
President




  
Actuar

Pleiv da Suraua :

  
President


**Pleiv catolica  
Suraua**

  
Actuar

Pleiv da Vrin :

  
President

**Parvenda Vrin  
7149 Vrin**

  
Actuara